

# Львовд баях бумбс болн музеймүд

Львовин ик хол захас, Карпатин, утан мет ценькр, уулмудин белд тодраггар йилгърдж, дееран ондр шивата хурц шовгър цомг үзгднэ. Долан зун джил хооран эн уулин белд орсин зааснгр Даниил Галицкий эклдж балгс тосхдан, терүтан көвүндан нераддж. Львов гидж нер өгсн мөн. Эн ондр шива, эрг мет, цуг эргндг газрасн йилгърнэ. Энүнэ ора деерас халахла, хуучна балгсна соньн саяхн баадл үзгднэ.

Львовд ирдг экскурсантнр болн туристнр, XVIII зун джилин эклцар Петр I ирдж зогсдг гер халацхана. Тиигхд Деед Украинэ амтнд нөкд болхар, тедниг шведск булагчнрас сулдххар туургсн орс церг энд ирсмн. Эндас экскурсантнр, Иван Франко гидг, гол уульнцур одцхана. Эн уульнцд баасн хойр давхр саяхн бичкн герүр эднэ онг тусна, эц герт, Украинэ нерта бичач Иван Франкод нерадсн литературн-мемориальн музей баанэ. Эн музейд күч-көлсэрн баадг улсин алдр үрнэ туск баадл джиргъл — ик өргн кевар үзүлгддж. Иван Франко Украинэ литературин тууджд зуг бичач-революционер болдж биш, олна үүлдач, орс болн украин келн-амтсин иньглтиг ияалгъдж, батлдж йовсиг энд үзүлджанэ. Ода эн музейд шин анг немгдв, терүнд баах документс, тер алдр күүнэ, Деед Украинг Советск Украинэ негдүлхар сандж йовсн седклинь үзүлджанэ. Бичачин сандж йовсн санан болн эн нутгин күч-көлсчрин зун джилин ицлт хөрн джил хооран күцагдв. Советск олн келн амтнэ ницннггү бүлд Советск Украинэ Деед областсин күч-көлсчнр эвранны шин джиргълан тосхджана.

Украинэ билг-эрдмин музейиг амтн икар соньмсдж халаджанэ. Одахн терүнэ көрннгн болн зургуднь шинрв. Эн музейд ховр үзгддг хуучна зургудин, архитектурин, скульптурин произведень, гарар бичсн дегтр-мүд. XVII — XVIII зун джилмүдт баасн. Деед Украинэ нерта урн эрдмта улсин кесн кевсмүд, модар, төмрар,

чолуггар кесн көдлмш баанэ.

Этнографин болн. УССР-н науксин Академин зургуд келгнэ музейд, тууджин болн краеведческ музеймүдт, орн-нутгин зургудин галерейд орсин болн газадин ордудин алдр урн улсин ховр үзгддг произведеньс цуглуулгддж.

Ирсн улс икар байсдж Иван Франкон нерта, оперин болн балетин театрин гериг ик гаяхмджта соньн архитектурн бумб гидж, Иван Франкон нерта Львовск университетин дүнгыасн саяхн гериг бас икар гаяхцхана. Львовд ода баах негн — эн арвн хойр ах сурггулин университетсин Советин йосна джилмүдт Львов йоста гидг кадр белдлгнэ школ болад, 148 зүсн эрдм өгдг болв. Львовин ах сурггульд сурцах студентнр, 40 сай амтн баах Бразил студентнрас, Иракин, Турцин болн Афганистана студентнриг хамдн авсн бийн ик. Энд энүнэс нань 28 техникумс көдлджанэ. 1939 джил күртл энд украинец күүнд сурггуль сурхд күчр билэ. Ах сурггулин үүдд «угатынрин күүкдт» хаалгыата баасмн.

Оперин болн балетин театрин өмнхад чолуггар кесн В. И. Ленинэ бумб зогсджана. Энүнэ хаджуд марксизм-ленинизм ик үнтэ зөөр В. И. Ленинэ центральн музейин филиал баах гер зогсджана.

Эн музей секгдснэс нааран Советск Украинэ Деед областсин балгсдин болн селэдин хойр сай гар күч-көлсчнр ирдж халацхав.

Львов тогтснэс нааран кесг му, күчр баадлла харгъв. Энүг фашистск булагчнрас сулдхсн джил мартгдшго джил. Ленинэ нерта уульнцд ондр девсн деер даяч танк зогсджана. Эн танк түрүн болдж балгснур ордж ирсмн. Львовин күч-көлчнр Тöрскнанны төлэ аман өгсн, зөрмг советск даячнриг мартшгон төлэд, архитектурн кевар кеерүлад ондр толгья кедж, терүн тал джил болгн багчуд одцхана.